

# QUÆSTIO MEDICA.

*Quodlibetariis disputationibus manè discutienda in Scholis Medicorum,  
die Jovis 16 Novembris 1718.*

M. LUDOVICO-CLAUDIO BOURDELIN,  
Doctore Medico, Præside.

*Utrum nascenti crudo pulmonis tuberculo aquæ potus?*

## I.

**P**ULMO est aspera arteria prolongata; illa si quidem in duos 1<sup>o</sup> dividitur ramos, qui in minores postea, & demum in infinitam minimorum ramulorum sylvulam scinduntur. Exiguus quisque ramus desinit in membranam ovalem in distento, plicatam & contractam in vacuo Pulmone. Hi canaluli Bronchia vocantur. Ita sunt dispositi, unus quisque ut ab uno latere arteriolam, ab alio venulam ex Pulmonalibus arteriâ & venâ ortam habeant. Adsunt præterea glandulæ majores in majoribus, minores in minimis ramis. Quasdam (adeo sunt exiles) non nisi ope Microscopii detegas. Hæ humorem per cribra tenuia secernunt, qui quandiu innatâ pollet fluiditate, abluendis & emolliendis partibus inservit. Quo enim pacto ab aëre frigido & sicco impellente in Pulmones, illi non indurarentur, nisi pro balneo & linimento accederet humoris cujusdam fluidioris & visciduli beneficium. Sunt & vasa lymphatica quæ ductus sanguiferos ubique concomitantur, donec collecta in quosdam trunculos, serosi laticis è pulmonibus residuum ductui thoracico infundant. Apparent demum nervi numero complures. Hi vasa sanguifera lymphatica & Bronchia, variè super scandunt, ligant, atque inter ea disseminantur. Hanc Pulmonum compagem investit membrana duplex, 1<sup>a</sup>, quæ est exterior, videtur nervorum intexta filamentis, & nervea est. Interior altera crassior paulò & aspera non nihil, ex vasorum vesicularumque extremitatibus conflatur. Artificiofam illam Pulmonum fabricam intrat aër, gravis, fluidus, elasticus, permeat, premit, dilatat. Motûs continuâ alternatione à solidis fluida in Pulmone contenta, diverberantur propelluntur. Liquidi partes immutantur, imminuuntur variè. Hinc in secretionibus apparatus; inde sanguinis rutilans color. Ibi ipsius elaboratio & officina. Reciproco nimirum impulsu aëris, vesiculæ pulmonales distenduntur & concidunt. Ab iis eadem lege agitantur, & innumeris succutiuntur motuum determinationibus fluidorum particule in vasis interstitiis vesicularum pererrantibus contentæ. Ita ut si quæ partes sanguinis, systoli & diastoli cordis effugerint, Pulmonum angustioribus in Mæandris iteratâ multiplici oscillatione torqueantur amplius, & conterantur. Ut quid enim prudens natura, nec quidquam molita incassum, massam sanguinis nutriendo corpori, & peragendis functionibus destinatam per Pulmones agi totam vult, nisi ut eidem elaborationis ulterioris perfectiorisque nova ibi fiat accessio. Unâ cum aëre, sed diversis canalibus eunt & redeunt Pulmones, sanguis & lympa secreta à sanguine. Quæ quidem quandiu eâ, quâ par est ad sanitatem feruntur fluiditate, tandiu Pulmo integer malique purus est. Cum autem aut errore aliquo in rebus non naturalibus, aut quovis alio casu cessat constans ille ordo & motus; tunc torpent liquores; cessat aut saltem minuitur solidorum robur; referciuntur tenacitate liquoris glandulæ, lympa ibi coactervata stagnat, facta tuberculis concrevit, successu temporis abitura in putredinem.

## II.

**T**UBERCULUM Pulmonis est tumor in Pulmone, à lymphâ nimium inspissatâ, in glandulis bronchialibus remorante, ac post certum quoddam temporis spatium putrescente, trahens originem. Eò periculosius malum illud censei debet, quòd velut ignis suppositus cineri doloso serpit tacite, & obscurioribus ortus incunabulis toti corpori exitium minatur & affert non raro. In glandulis sedem ponit. Inde ipsius à vomitâ discrimen, quam vesiculis innasce

pulmonalibus suspicandi ansam præbet spiritus gravè olens, à puris fœtore aërem è Pulmonibus expulsum inscenscente ortus. Glandulæ Pulmonis angulis asperæ arteriæ in ramos divisæ adjacent; nulla ipsarum cum aëre externo communicatio. Unius glandulæ infarctum sequitur alterius oppletio: Quoad ferali serie plures simul obstructæ tuberculum efformant. Per 12 aut 14 dies ex \* Hippocrate augetur, & post ruptionem ex eodem Hippocrate ad 40 usque suppurat. Signa nascentis tuberculi licet vix sensu percipiantur; attendas, & aderunt quædam. Hæc sunt; respiratio agra paululum, sed sine stertore; Tussis sicca, Pituitæ in grandinis formam concretæ excreatio; Doloris errabundi circa varias pectoris partes molesta & continua sensatio. Levissima illa quidem, & quæ semper in eodem ægroto non omnia occurrunt. Requiritur idcirco ad morbi nascentis cognitionem, prudentis Medici acumen & criterium. Respirationem agram, rectius in eo casu à crispaturâ bronchiorum prodire affirmes, quàm à pituitæ copiâ quæ pauca admodum tunc temporis hæret pulmonibus. Hinc licet spiritus sit subdificilis, abest tamen stertor, aëris sese è lymphæ viscosæ ambagibus expedire conantis impetus. Hinc etiam sicca tussis, ob trachæam arteriam irritatione, & vellicatione continuâ laceffit. Nec vero hæc sola signa attendendi patent naturæ ministro. Emergit signorum illas altera ex naturâ ægri, ex ipsius conformatione, ex parentum bonâ aut malâ valetudine, ex eorum dispositione ad certos quosdam morbos. Notum quàm facile Phisici Phthisicos generent. Nota certi cuiusdam hominum generis ad Thoracis morbos proclivitas. Sic ex Hippocrate, *libro de articulis*, gibbosi illi duris ut plurimum tuberculis infestantur, quibus supra septum transversum gibbus imminet. Quibus vero infra, iis vitia Renum & Vesicæ sæpius contingunt. Solis fluidis functiones integræ aut læsæ meritis non ascribuntur, nec meritis solidis. Non illæ sine amborum amicabili peraguntur commercio, non sine eorumdem mutuo dissenso debilitantur aut cessant. Dissensus ille, si finis spectetur, consensus est. Utris horum prima mali labes imputanda sit, mutuum Physiologi rimari curiosius. Sufficit mutua contentarum & continentium partium in eundem finem conspiratio. Partium principatûs notione & diligentiori indagatione, nec Medico major in medendo securitas, nec ægro promptius aderit levamen. Solidis tamen primas deferre suadet mechanica partium structura, cor musculari vi contractile, arteriarum tubi elastici, ab iis pendentes functiones, sanitas, vita; Glandularum varia incernicula, minimorum vasorum sanguiferorum & lymphaticorum meatus variæ tenuitatis; diversæ in diversis hominibus eorumdem alimentorum productiones in statu morbofo & sano. Ut quid ille ex eo cibo succum laudabilem elicit, è quo alter nihil eruit nisi crudi & indigesti? Ut quid eadem vel minutissima terræ gleba frumentum fert & aconitum? An hoc à fluidis solis prodire, ille affirmabit, cui perspectus naturæ consans tenor & eadem semper in operando simplicitas.

\* Lib. 2. de Morbis.

### I II.

**LYMPHA**, liquor ille proxima nutritionis materies, partibus constat glutinosus, fluidis tamen, ut pote quæ vasa corporis minima permeent. Levi igne ad instar ovi albuminis concrevit; albumine tamen ovi fluidior, partium corporis nutritionariam reparatrix est, & prompuiatrum. Illa continuam utriusque transpirationis acturam refarcit; ad quod opus requiritur & partium dispositio, & idonea ad varios recessus configuratio. Si tenuior, avolat; si crassior, arcetur; unde modus, quem ultra citraque nequeat nutritio consistere. Cum autem ad illum pervenit lymphæ crassitie gradum qui procreando tuberculo aptus est, non aliunde quam à diluentibus remediis tentandum est levamen. Quæ quidem non sine delectu propinanda sunt: quædam enim noxâ non carent. Potulenta omnia ex plantis mucilaginosi aut similibus extracta in usum non adhibeat qui morbum sanare aggreditur. Nisi æger robustiore nactus sit stomachum; quod rarum in tuberculosos. Viscosis enim partibus horum potulentorum gravatur stomachus; chylosis impeditur. Inde depravati humoris fons inexpletus. Sales involvuntur pinguioribus particulis, non destruantur. Liquoris lentore irretiti larvæque tantum, viâ circulationis ad partem affectam ut ad cæteras deferuntur; apti qui inspissentur, & obstructione meatuum nacti remoram, sistant. Hinc mali augetur vis effera; tuberculi formatio, augmentum, suppuratio accelerantur. Remediis utendum quæ simplicissima sunt. Frustra primævam illam simplicitatem in iis quæras, quæ tribus è regnis eruantur. Aderunt semper sulphura & sales. Hi coagulant, illa obstruunt. Ex his omnibus potubus qui ad debellandum huncce affectum præferri possunt, aqua primas obtinet. Illa siquidem partibus lævibus prædita & instar anguillarum lubricis, intra lamellas salium serpit. Sales in minima divisi spicula dissolvuntur. Sanguis dissolutis quibus scaturiebat salibus, jam nihil ad partem læsam deferit, nisi blandi. Ex appulsu continuo talis lymphæ duplex utilitas percipitur. Non appellit de novo ad Pulmones materię morbofæ copia; & illa, si qua sit, quæ jam moretur in glandulis, lymphâ diluitori paulatim emollita per transpirationis vias foras auandatur. Cavendum ab iis omnibus quæ, ut aiunt, apta sunt frangendis viscosis humorum partibus. Ea enim non sunt nisi salia, quæ spiculis dum agunt in fluida, non possunt in solida non agere. Talium usu remediolorum citi; a-

tis & contractis de novo fibris, morbus recrudescit potius quàm tollitur: cùm enim tuberculum Pulmonis idem sit quod Phyma in aliis partibus, eandem desiderat curationem. Quis verò adhibitis violentioribus medicamentis remorantem v. g. in glandulis intestinalibus materiam solvere tentaret? unde nam corpora robustiora sanantur potius longo usu aquosi medicaminis, quàm Cathartici aut Emetici vehementioris impetu nimium præcipiti? nisi quod vellicata ceteris irritationibus fibra in sese retrahatur, & imminutâ canalis diametro cœcis comprehensam in anfractibus materiam strictiori nexu constringat. Nec nimis ex simplici nostrâ diatrâ, quàm ex quovis alio pharmaco, Medico debet accedere gloria. Quis Medicus? ille cuius consilio & iussu ea assumuntur aut rejiciuntur, quæ aut profunt aut nocent. Non ideo sanant medicamenta, quòd è longè perantur; nec apud sanos major est è longinquo reverentia. Nonne cholera morbum solvit sæpissimè frigida vulgaris haustus. E successu felici debet æstimari remediū pretium; nec à potu chymicis è præparationibus conflato, & immensâ remedium conglomeratione farragine debet expectari certior salus, aut celerior. Simplici methodo operetur, qui naturæ simpliciter operantis minister est.

## I V.

**U**T in aliis omnibus morbis, sic & in Pulmonis tuberculo, ex insensibili perspiratione non parùm damni imminet, aut percipitur utilitatis. Insensibilis perspirationis ea copia est, quæ ex Sanctorio die unicâ par sit excrementis alui quindecim dierum. Perspirationis necessitatem probant & evincunt ex ipsius aquo effluxu exurgens sanitas, imminutum eundem morbus, retentum & omnino impeditum mors subsequens. Intercepta in Cerebro perspiratio Apoplexiam, in Corde Palpitationem, in Pulmone Tuberculum, Vomica, Asthma, Inflammationem, in aliis partibus varia Phymata procreat, Abcessus, verbo dicam, morborum catervam omnem. Pulmo ex omnibus corporis partibus maximè perspirat. E corpore in statu salubri uno die 40. uncia materię perspirabilis exhalant: E Pulmone 8. id est, sexta circiter pars totius corporeę perspirationis; patet illud speculo ori appposito, & condensatis illius ope vaporibus & halitibus è Pulmone expirationis tempore expulsi. Duplici potissimum de causâ in Pulmone, ut in reliquo corpore, imminuitur perspirationis salubre effluvium. Una exterior est, interior altera. Fibre corrugata nimis, Lympha spissior, intus eam retinent. Extus retundit aer frigidior. Utrique causæ nullum esse aquâ remedium præsentius ex supra dictis colligas. His procul dubio adductus argumentis Magnus Hippocrates ubi loquitur de nostro tuberculo, aut huic ortu similibus cæteris Pulmonum morbis, præscribit balneum aquæ calidæ, sorbitiones, aquam mulsam. Sorbitiones eò videntur collimare, ut cùm medium quid sint cibum inter & potum, facilius à stomacho debili subigantur. Secus enim à chylo crudo materiæ morbosæ novum fieret additamentum. Aquâ mulsâ Sanguinis & Lympha compagem dilutiorem blandiorem reddi voluit. Balnei verò quinquam est usus, nisi relaxandi & emolliendi? Unde à solidis tonus salubris solitusque restituitur, liquidis diverberatio fortior accedat, major fluiditas, partium perspirationi dicatarum uberior exhalatio. Sublato aquæ potu, ea nocent, quæ cum aquâ profunt sæpissimè. Equitationem pectoris affectibus plurimis convenire apud Artis Magistros in confessio est; tum ob motum illius ope toti corpori & Pulmonibus impertitum; tum etiam ob situm crurum & tibiarum. Illæ enim pendula dum equo insidimus, sunt veluti via regia quâ humores nocivi, ex superioribus corporis partibus detrussi, & ruentes, minori negotio eliminantur. Tibias & crura non nihil cum pectore consentire quis negaverit? Qui Phthisim incipientem cauterio Tibiæ inusto sanaram fuisse spectaculum habuerit: & oculo illo itinere iterum ingruentem, eodem remedio iterum fuisse averfam. Equitationis igitur labor altis saluberrimus, absque aquâ sit insalubris. Illo exercitio indurabitur Lympha in Pulmone morata, & vergens ad concretionem; si quid enim liquidi restabat quod potuisset eam diluere, illud perspiratione copiosiori & intempestivâ in auras abibit. Supererit tantum pars crassior, morbi causâ & augmentum.

## V.

**A**VINO temperet qui de sanando in ptimis incunabulis tuberculo cogitat. Noxium est omnino sive spectes ad solida, sive ad fluida. In illo morbo contentæ pattes inspissatæ egent dissolvente, non coagulo. Continentes indurata & crispata, molliem possulant, non vellicationem. A salibus vini cujuslibet quid expectandum? nisi totius massæ sanguineæ majus coagulum. Solidis vinum non benignius. Vasa crispata, vellicata, inde motus liquorum retardatio, perspirationis imminutio. Hinc qui vino aut ex ipso extractis fervidis liquoribus dediti sunt, Arthritidi ut plurimum patent. Hinc etiam ruptis lymphaticis vasīs frequentes adeo in iisdem hominibus pectoris & abdominis hydropes. Non sit metus à vini abstinentiâ ne debilitetur ventriculus. Vino immersa carnes indutantur, aquâ molles, flaccidæ eva-

dunt. Animantium genus omne simplici isto potu utitur, solum hominem si excipias. Pecudes vitam degunt aquæ beneficio nostrâ vegetiorem. At oves, boves, porci, canes tuberculis obnoxii sunt, testantur Anatomici recentiores, testatur & ipse Hippocrates *lib. de intern. affect.* Quid inde? Porci cum omne indiscriminatim usurpent alimenti genus, canes iisdem ferè, quibus nos utimur, vescantur cibis; mirum ne videri potest quòd morbis iisdem laborent? Oves bibunt aut rarò, aut nunquàm: in illis aquæ usu, tuberculi pestis posset præcaveri. Quod cum aquæ potu boves tuberculosi evadant, illud immeritò tribuas aquæ vitio, aut alimentorum quibus utuntur; sed soli structuræ solidarum partium. Cur enim, cætera animalia cum eodem potu & pastu, iisdem affectibus non tentantur? Vinum quidem Authore Hippocrate propinatur iis quos vexat tuberculum. Fatemur; & stabunt tamen inconcussa quæ diximus. Tunc enim loquitur de suppurato tuberculo, ubi exsiccandum est ulcus; nos autem de nascente. Aqua multa, eodem Authore, convenit in hisce morbis. Nec ratio habenda est acidi in melle contenti; quod multâ aquâ dilutum vix aliquid retinet nocivæ indolis, modò eligatur albissimum & recens. Præ tamen omnibus aqua levissima, limpidissima, simplicissima. Ab eâ nec inspissationis, nec irritationis aut velli-cationis periculum. Cùm igitur illius ope diluentis pristinum fluorem contentæ partes, totum continentes recuperent, perspirationis salubre effluvium nocivarum partium fugâ mutatis his quæ supersunt procuretur, symptomata tuberculi mitescant, signa evanescant, morbus ipse tollatur radicitùs; licet concludere.

*Ergo nascenti crudo Pulmonis tuberculo aqua potus.*

Domini Doctores disputaturi.

*M. Jacobus Antonius Millet,*

*M. Joannes Matthæus Le Berr,*

*M. Ludovicus Lomery, Regiæ Scientiarum Academia Socius.*

*M. Michael Penget.*

*M. Nicolaus le Tellier,*

*M. Petrus le Tonnelier.*

*M. Joannes Baptista Faustus  
Alliot de Mussy.*

*M. Petrus Afforti,*

*M. Carolus Thuillier.*

Proponebat Parisiis GUILLELMUS DE MAGNY,  
Baccalaureus Medicus, A. R. S. H. 1719.